

瑜伽師地論 卷第四十五

彌勒菩薩說

三藏法師玄奘奉 詔譯

本地分中菩薩地第十五 初持瑜伽處菩提分品第十七之二

云何菩薩妙陀羅尼？

當知如是妙陀羅尼，略有四種：一者、法陀羅尼，二者、義陀羅尼，三者、呪陀羅尼，四者、能得菩薩忍陀羅尼。

云何菩薩法陀羅尼？

謂諸菩薩獲得如是念慧力持，由此力持，聞未曾聞，言未溫習、未善通利，名句文身之所攝錄，次第錯綜，次第結集無量經典，經無量時，能持不忘，是名菩薩法陀羅尼。

云何菩薩義陀羅尼？

謂如前說。此差別者，即於彼法無量義趣，心未溫習、未善通利，經無量時，能持不忘，是名菩薩義陀羅尼。

云何菩薩呪陀羅尼？

謂諸菩薩獲得如是等持自在，由此自在加被，能除有情災患。諸呪章句，令彼章句悉皆神驗，第一神驗，無所唐捐，能除非一種種災患，是名菩薩呪陀羅尼。

云何菩薩能得菩薩**忍陀羅尼**？

謂諸菩薩成就自然堅固因行，具足妙慧。獨處空閑，寂無言說。曾無有物，見路而行。知量而食，不雜穢食，一類而食。常極靜慮，於夜分中，少眠多寤。於佛所說得菩薩忍諸呪章句，能諦思惟。其呪詞曰。

壹胝 蜜胝 吉胝 毘羸底（丁里反） 鉢陀膩 莎訶

即於如是呪章句義，審諦思惟、籌量、觀察。彼於如是呪章句義，如是正行，不從他聞，自然通達。了知如是諸呪章句，都無有義，是圓成實，但唯無義。如實了知此章句義，所謂無義，是故過此，不求餘義。齊此，名為妙善通達呪章句義。

彼於如是呪章句義正通達已，即隨此義，不從他聞，自正通達一切法義。謂於此義如是通達，一切言說所說諸法自性之義，皆不成實，唯有諸法離言自性，是自性義。彼於諸法，此自性義正通達已，過此更無餘義可求。由於此義善通達故，獲得最勝廣大歡喜。

由是菩薩得陀羅尼，當言已得此陀羅尼章句所立菩薩勝忍。得此忍故，是諸菩薩不久當得淨勝意樂，已依上品

勝解行地勝忍而轉，當知是名菩薩所有能得菩薩忍陀羅尼。

此中菩薩法陀羅尼、義陀羅尼，若過第一無數大劫，已入清淨勝意樂地，所得決定堅住廣大。從此以下，或以願力，或依靜慮，雖有獲得，而不決定，亦不堅住，亦不廣大。如說法、義二陀羅尼，呪陀羅尼，當知亦爾。能得菩薩忍陀羅尼，如前所釋，即如是得。

若諸菩薩具四功德，方獲如是諸陀羅尼，非隨闕一。何等名為四種功德？

- 一者、於諸欲中，無所貪著。
- 二者、於他勝事，不生妬（妬¹）忌，不嫉他榮。
- 三者、一切所求，等施無悔。
- 四者、於正法中，深生忻樂。忻樂法者，於菩薩藏及菩薩藏摩怛理迦，深心愛樂。

【經文資訊】大正藏第 30 冊 No. 1579 瑜伽師地論

¹ 妬 = 妬【宋】【元】【明】【宮】【聖】